

Vischnaunca da Mustér

**Lescha davart ils dis
da ruaus publics**

1999

-
- Art. 1 Camp d'applicaziun
- Art. 2 Dis publics da ruaus, fiastas principalas
- Art. 3 Garanzia dil ruaus public
a) general
- Art. 4 b) fiastas principalas
- Art. 5 Excepziuns
- Art. 6 Temps da lavur
- Art. 7 Castitgs
- Art. 8 Vigur

Art. 1

Camp d'applicaziun

Questa lescha fixescha ils dis publics da ruaus sin igl intschess dalla vischnaunca da Mustér e reglescha la protecziun dil ruaus public duront quels dis.

Prescripziuns divergentas e cumpletontas ella legislaziun federala e cantunala restan resalvadas.

Art. 2Dis publics da ruaus,
fiastas principalas

Sco dis publics da ruaus valan:

- a) las fiastas principalas (Venderdis sogn, Pastgas, Tschuncheismas, Rogaziun federala e Nadal);
- b) las dumengias ordinarias ed ils firaus statals (Daniev, Gliendisdis-Pastgas, Anceinza, Gliendisdis-Tschuncheis-mas, emprem d'uost e sogn Stiafen);
- c) ils firaus locals (sogn Giusep, Sontgilcrest, Nossadunna d'uost e Numnasontga).

Il cussegl da vischnaunca ha la cumpetenzza dad adattar ils firaus locals allas relaziuns semidadas.

Art. 3Garanzia dil ruaus
public
a) en general

Ils dis publics da ruaus ein tuttas activitads scumandadas, che disturban quei di il ruaus e la dignitad commensurada, il survetsch divin ni che violeschan il sentiment religius dad outras persunas, specialmein:

- a) occurrenzas, lavurs e funcziuns colligiadas cun canera ni cun outras immissiuns disturbontas, surtut ella vischinonza da baselgias duront ils survetschs divins;
- b) lavurs da construcziun, scavaments e lavurs semegliontas;
- c) lavurs dil furs e d'uaul cun resalva digl art. 5 lit. b);
- d) il casegliar.

Art. 4

b) fiastas principalas

Las fiastas principalas eis ei plinavon scumandau:

- a) arranschaments da recreaziun;
- b) presentaziuns da teater;
- c) arranschaments da sault publics;
- d) exerchezis da sittar;

- e) occurrenzas sportivas;
- f) tener aviert stizuns da vendita, priu ora pasternarias, apotecas e kioscs.

Art. 5

Lubidas duront ils dis publics da ruaus ein specialmein:

Excepziuns

- a) lavurs necessarias en interpresas ch'ei dependentas d'in menaschi permanent;
- b) lavurs ell'agricultura per perver animals e dependentas dall'aura, aschilunsch ch'ei exista il prighel che la raccolta vegn svaletada ni lavagada;
- c) survetschs e lavurs ch'ei necessaris per mantener l'offerta turistica;
- d) lavurs urgentas en cass d'accidents e catastrofas; il tener aviert las stizuns.

Art. 6

Las prescripziuns legalas davart il temps da ruaus pils luvriers restan resalvadas. Il cau dil menaschi ei responsabels che las prescripziuns legalas davart il temps da lavur e la reglamentaziun da lavur fixadas els contracts vegnien observadas.

Temps da lavur

Art. 7

Surpassaments dallas prescripziuns cantunalas e communalas davart ils dis publics da ruaus vegnan punidas entras la suprastonza communal cun in castitg da frs. 200.- entochen frs. 1'000.--.

Castitgs

Art. 8

Questa lescha va en vigur suenter ch'ella ei acceptada dil pievel.

Entrada en vigur

Cun la vigur da questa lescha ein tuttas anteriuras prescripziuns cuntrarias cassadas, en special la lescha davart paus e ruaus per fatschentas e negozis per la vischnaunca da Mustér dils 19 da zercladur 1983.

Acceptau dil pievel ella votaziun all'urna dils 28 da november 1999.

Il president communal:
Aldo Tuor

Il canzlist communal:
Andri Hendry